

新民晚报 | 星期天夜光杯 / 上海闲话

上海解放第一声 ◆ 储有明

老里八早

今年上海解放七十七周年。一九四九年五月二十五号一大早,全上海老百姓刚刚从困梦里醒过来,就从屋里个无线电——也就是老上海讲个“玻璃电台”里向,听见播音员李云森喜气洋洋个声音:“上海解放了!人民解放军已经开到了南京路!”迭个消息一下子传遍上海。接下来,播音员一字一句,完整播报了《中国人民解放军布告》。

讲到“玻璃电台”,老上海有印象。伊就开辣南京路四大百货公司之一新新公司五楼,是一家民营广播电台。伊原本个名字叫“凯旋电台”,只勿过整间播音室四面全部是落地透明玻璃。电台里向所有个电器设备,还有播音员坐辣台子前头工作个样子,统统拨来新新公司买物事,兜白相个客人看得清清爽爽。就因为那副透明别致个样子,上海人统统叫伊“玻璃电台”,反倒让

伊原本个名字“凯旋电台”几乎被人忘记脱了。

上海人天生欢喜热闹猛、看新鲜。当年到新新公司买东西,顺手就能望望玻璃里向打扮得山青水绿个播音小姐。更有勿少戏曲名家、滑稽名角轮番来此地播音,老百姓立辣外头免费看热闹,真真是勿出铜钿看白戏,噱头十足,天天人头攒动,热闹非凡。

讲到新新公司,1926年正式开张营业,算是南京路四大百货里个“小阿弟”。伊比贴隔壁、1917年开业个先施公司晚开九年,也比斜对面、1918年开业个永安公司晚了八年。前头两家都是上海滩百货行业个老大哥,根基深、名气响,新新公司想要立足,自然要多动脑筋。当时个先施、永安两家百货公司都是辣英国伦敦注册登记个洋行背景,主要卖各种进口洋货。新新公司则是一家国内注册个本土商业公司,主要卖国产货,勿卖洋货。

埃歇辰光,上海个时髦小姑娘、阿姨妈妈,伙欢喜穿进口乔琪纱做个旗袍,面料闪闪发亮,走辣

马路浪向风头十足。新新公司看准潮流,顺势打出爱国国货招牌,首创用本土“阴丹士林”布料制作旗袍,引领新风尚。新新公司还专门邀请电影明星、时髦模特,辣二楼纺织品展厅办了一场又一场阴丹士林旗袍时装秀。整场走秀实况,伙通过五楼个玻璃电台同步直播。一传十、十传百,消息传遍上海滩,上海女同胞顿时掀起一股阴丹士林旗袍热潮。就靠那只别出心裁个玻璃电台,新新公司硬生生从激烈个百货竞争里杀出重围,立稳了脚跟。

而那只赫赫有名个玻璃电台,留按老上海最难忘、最有分量个高光时刻,就是1949年5月25号,传出了振奋人心个上海解放第一声。一道电波,定格了上海迭座城市个新开端,成为永勿褪色个红色记忆。



听钱程沪语朗读
微信扫码看视频

灶披间

黄花菜炒肉丝 ◆ 沈一珠

掰两日新鲜黄花菜刚好上市,一盒150克,卖十七八块洋钿。要是碰着店家打折,还能再便宜四五块。顺带配一块里脊肉,切成肉丝,摆上生粉、少许素油、料酒和盐,抓匀腌一歇,放旁边备着。

黄花菜先用清水汰清爽,一朵朵剥开来,拿里头嫩黄个花芯全部掐脱。随后浸在盐水里半个钟头,嫌麻烦个话,直接开水焯一遍也可以。

起只油镬,先拿肉丝煸到八分熟,盛出来摆好。就用镬子里剩下来个底油,再煸黄花菜,加少少清水,拿煸好个肉丝再倒进去,一道翻炒两三分钟。调好咸淡就好出锅,趁热吃最适意,口味清清爽爽,就像初夏日头里,手心里捧着一捧野雏菊。

黄花菜,上海人也叫黄花、萱草。唐朝诗人孟郊有句名诗:“慈母手中线,游子身上衣。临行密密缝,意恐迟迟归。谁言寸草心,



报得三春晖。”诗里讲个寸草,就是那萱草。承蒙孟春、仲春、季春三春个日光雨露滋养,萱草到了初夏,便开出金灿灿个花朵。

老早有个习俗,小辈出门远走他乡之前,会在姆妈住个屋前种上萱草。盼着春日花开,能让

姆妈赏心悦目、消解愁闷,所以萱草又有个别名叫忘忧花。

其实萱草天生就有忘忧养生个功效,我从书里看到过记载:伊可以入药,能预防皮肤松弛;还能疏解气郁、止痛降脂,让人心境平和、放下烦恼,对调理更年期不适也有好处。讲起来,真个是贴心体恤母亲个一味好物。

书里还记着一道萱草忘忧茶个简单做法:

原料:干黄花菜,也就是金针菜25克,冰糖两粒,或者用蜂蜜也可以。

做法:拿干黄花菜搭冰糖(或是蜂蜜)一道放进茶杯,冲入滚开水,焖泡廿分钟就能喝,还可以反复冲泡两三回。

掰天早浪眼睛张开,6点左右,收到女儿发来个一条短信,Happy mother's day,另外一朵小红花、一张笑面孔。大多数做姆妈个,要求个简单,就那么一点点,就足以无忧了。

沪语趣谈

“光生”一词溯源流 ◆ 叶世荪

前几年《潇湘晨报》曾撰文,提及四川话里有句趣味表达:有一种体面,叫“光生”。文中解释:地面平整无凹凸、不堆放杂物,便可形容地面“光生”;若是女子天生汗毛浅,双臂肌肤细腻洁净,也会说长得“光光生”。

这个让普通话使用者倍感费解的方言词,上海人却十分熟悉,日常使用极为普遍。《上海方言词典》中有例句:“那圆台面真光生”;上海辞书出版社于

1986年5月出版的《简明吴方言词典》亦载:“伊个皮肤雪白细嫩,摸上去蛮光生”。

“光生”本义是光滑光洁、干净平整,也可形容行事妥帖利落、做事干脆不拖沓、不留隐患;而《潇湘晨报》

提及的“体面”之意,则是它延伸出的引申义。

追根溯源,“光生”一词在古汉语中早有记载。宋代普济所著《五灯会元》卷十九有言:“看取宝积杖子,黑漆光生,两头相副”,描写信州灵鹫山宝积宗禅师手里拄的木杖乌黑发亮、光洁圆润。清代小说《活无常》中也写道:“哪知此妇又悍又狡,外面装的光生,心中实在痛恨”,此处的“光生”,是形容外表本分端正、行事圆滑妥帖。

语言始终在演变更迭,不少在北方渐渐失传的古汉语词汇,辗转留存于南方大地,慢慢扎根于上海、四川等地,成为当地方言的常用词。这类古词的传承,大多依托街巷曲艺、民间传说,靠着市井百姓口耳相传;而通俗小说、戏曲话本更是方言词语天然的留存载体。

1974年,描写川北乡村合作社生活的小说《春潮急》中,便出现了“光生”一词:“李让显然熟捻这类活计,手脚比李克麻利得多,补得又光生又整齐”。2014年风靡上海的小说《繁花》里亦有该词:“我笑笑,发觉小姑娘眉目周正,皮肤也光生”。两书作者,一位是四川眉山的克非,一位是上海作家金宇澄,不约而同使用了这一方言古词。

四川与上海虽属不同方言片区,方言里却有着大量通用词汇。除“光生”外,晚饭同称“夜饭”、哑巴同叫“哑子”、身形都说“身胚”、硬明皆言“硬扎”、标记统称“记认”、乞丐都称为“告化子”……其中缘由其实显而易见:两地方言同出一脉,根源皆是古代汉语。这也正是粤语、闽语等南方方言,与上海话存有大量相通词汇的根本原因。

茄山河

整理旧物事,翻出一沓小辰光个黑白老照片,顺带看见了我阿妹小时候白相过个几样老玩具。阿拉姐妹俩小辰光,从头到尾就只有一只洋娃娃,个头跟家里个小热水瓶差不多,生着一双小胖手、两只小胖脚,眼睫毛也长长个,老好看。我小辰光特别喜欢喜拔弄伊个眼睛白相,阿妹则是天天抱牢洋娃娃,认认真真喂伊吃饭,一边喂一边叽叽喳喳讲个不停,煞有介事地办家家酒,天真得要命。

现在个小囡玩具高级多了,新式娃娃带AI功能,会陪人白相。依喊伊名字,伊就应声过来陪伊聊天;要听音乐、听故事、唱儿歌,哪怕是随便茄山河,伊统统会。反观阿拉小辰光个洋娃娃,就是最普通个毛绒玩具,一点花头也呒没。但就是那只朴素个娃娃,踏踏实实陪了阿拉好几年,给了阿拉老多温暖和安慰,还逼着阿拉开动脑筋,靠自家个想象力变出各种各样个乐趣。

当然,现在个AI娃娃也确实勿赖,能帮小囡开眼界、认得大千世界,而且屏幕看勿多,也勿伤眼睛。只是少了点老底子个味道。

还有一张老照片,印象老深。照片里我坐辣草地浪,身边摆着一台玩具小钢琴。我一本正经坐辣旁边,装模作样弹琴,面孔浪个表情,满足得勿得了。

迭只黑颜色个小钢琴有三只雪白个琴脚,造型跟真个三角钢琴一模一样。手指头轻轻一敲,就能弹出正经个调子,有高音有低音,勿是那种干巴巴个单音。虽说一共就只有一个八度个音,可对小辰光个我来讲,已经吸引力十足。就是那台小小个玩具钢琴,带我走进了奇妙个音乐天地。

再讲讲老底子个飞行棋,最多可以四个小囡一道白相。大家轮流掷骰子,掷到几,自家个小飞机就飞几格。迭个游戏最有讲究,棋盘浪有些格子是陷阱,踏到

就要后退好几步,或者下一轮原地勿好动。一旦运气勿好踩中,立马就落后一大截。谁先稳稳飞到终点,谁就是赢家。

1986年,那年哈雷彗星路过地球。读初中个我受了飞行棋个启发,帮班级策划了一场“我为星星添光彩”个主题活动,一做就是一个学期。当时阿拉辣整面黑板报浪画好星空飞行轨迹,每个礼拜一,再根据同学们一周个表现,让代表每个人个小飞机飞到勿同个高度,调动起大家你追我赶个劲头。隔了介许多年,初中同学聚会个辰光,还有男同学专门寻我掰个老班长打趣,讲当年自家个小飞机老是停辣停机坪,从来呒没飞高过。可想而知,那活动当年拨大家留了老深个印象,确实起到了激励人心个作用。

还有一样老玩具是游戏棒,一根根细细长长,棒头浪涂满五颜六色个漆。白相个规矩老简单:先捏牢所有游戏棒,再轻轻撒开,让棒子交错堆辣一道。之后就要静下心来,屏住呼吸,一根一根慢慢抽出来,诀窍就是绝对勿能碰到旁边其他个棒子。

迭个游戏越白相越有难度,心也跟着怦怦直跳。阿拉从里向悟出道理,晓得啥叫顾此失彼,做事体要顾全大局。

老底子个玩具,朴素简单,呒没花里胡哨个噱头,却能让人全身心投入。白相个过程里,悄悄开动脑筋、长见识,还拉近了小朋友之间个感情。

如今个电子玩具、AI玩具,声光电样样齐全,互动新鲜又有趣,吸引力十足。但小囡还是需要白相一眼老式玩具,寻回童年本来个纯粹快乐,守住人与人之间有温度个相处。哪怕白相个辰光有人赖皮、拌嘴,偶尔闹得勿开心,也能辣那过程里,慢慢学会与人相处、好好打交道。

老玩具里个童年

◆ 赵杞蓉

沪语童谣

翻跟头 ◆ 杨建明

两个小鬼头,侬剃洋葱头,每天夜道头,床浪翻跟头。
手抱脚弯头,靠近额角头,轮流翻跟头,床尾到床头。

来回比劲头,数字记心头,辰光到钟头,相互点点头。
摆好小枕头,同时钻被头,露出脚趾头,呼噜响鼻头!

老年朋友慢一眼 ◆ 秦来来

今年是农历马年,马路浪、短信里,带“马”字个吉利闲话到处都是。啥个一马当先、快马加鞭、马不停蹄、跃马扬鞭……听也听勿过来。

不过对上了年纪个老朋友来讲,我倒想起一首老老歌,当年解放军总政歌舞团有名个歌唱家马玉涛,唱过一首《马儿啊,你慢些走》。但我今朝劝老年人“慢一眼”,跟这首歌个歌词一点也勿搭界。

我个意思蛮简单:现在年纪大了,碰到啥事情,脑子多转一转,手脚动作一定要慢一眼。

平常吃茶辰光慢一眼,当心勿要呛着;吃饭辰光慢一眼,当心噎牢;走路辰光慢一眼,小心自家损胶;跑到超市买物事,手机付钞票

也要慢一眼。勿要明明只买五十块个东西,手快一划变成五百块,回头还要被自家老太婆埋怨:那死老头子,做事体一点脑筋也勿动!

出门离家更加要慢一眼,多检查一遍,屋里向煤气、电灯、自来水,统统要看看有勿有关好。尤其要当心陌生电话。人家骗依讲,老伴拉马路浪撞倒了,或是老先生突然生急病送医院抢救,再勿然讲自家儿子闯祸事、被警察捉进去了……碰到那事体,千万要沉住气慢一眼,好好想一想,勿要被骗子花言巧语骗走袋袋里个养老钞票。